

E EUROPAQO KONSÌLO E MINISTRURENQO KOMITÈTO

I Rezolùcia ResCMN(2002)5

dikhindoj i aplikàcia E Konvenciaqi – kàdro k-ašti te aven arakhle e themutne minoritètură kaθar i Rumùnia

(adoptisardi kaθar e Ministrurenqo Komitèto k-o 13-to dīves le trintone çhonesqo anθar o berś 2002, k-o 788 kidipen le Ministrurenqe Biçhaldenqo)

E Ministrurenqo Komitèto, p-i bāza le 24-tone, 25-tone aj 26-tone artikulurenqi le Konvenciaqe-kàdro palal o araxhipen le themutne minoriteturenqo (savi si anavārdi maj dur “I Konvència - kàdro”), thaj pašal e Thema – Riga, save ċi sine mēmbrură¹,

Liindoj samaθe i Rezolùcia (97) 10 anθar 17 septèmbro le berśesqo 1997, savi del e règule adoptisarde kaθar o Komitèto le Ministrurenqo, kaj dikhen e monitorizaciaqo mexanizmo anglaldikhlo k-ël artikulură 24, 25, 26 anθar i Konvència – kàdro, po but i règula 39² la Rezoluciaqi (97) 10;

Liindoj samaθe e alosaripnasqi règula, lini anθ-o kontèksto e adoptisaripnasqo la Rezoluciaqo (97) 10³;

Liindoj samaθe e ratifikaciaqo instrumèto, kaj sas andino kaθar i Rumùnia k-o 11-to dīves le majosqo anθar o berś 1995;

Sikavindoj ke o rumunikano govèrno tradās / biçhaldās o themutno rapòrto anθ-o jekhto monitorizaciaqo ciklo anθ-o kontèksto e Konvenciaqo – kàdro, k-o 24 jùnio 1999;

Liindoj anθ-o dikhipen ke, k-o akharipen le rumunikane governosqo, O konsultativo Komitèto akceptisardās te tradel anθ-i Rumùnia jekh delegàcia k-ašti te liel informàcie maj buxle thaj kadaja sas kothe anθ-i periòda 19-21jùnio, anθar o berś 2000;

Liindoj anθ-o dikhipen ke o avizo le konsultativone Komitetosqo dikhindoj i aplikàcia kaθar i Rumùnia e Konvenciaqi - kàdro sas adoptisardo k-o 6-to dīves le štartone çhonesqo e berśesqo 2001 thaj palal sas tradino le permanentone biçhaldesqe e Rumuniaqo, sas dino le permanentone biçhaldenqe savorre themenqe - membrurenqe thaj vi le biçhaldenqe anθar e Thema - Riga save na-i mēmbrură - le dokumentoça CM(2001)91 palemdikhlo aj maj palal sikavdo e publikosqe kaθar o rumunikano govèrno;

Liindoj anθ-o dikhipen ke o rumunikano govèrno biçhaldās pesqe xramosarde komentàrie save dikhen o avizo le konsultativone Komitetosqo an-jekh intervàlo štare çhonenqo palal o dinipen kodolesqe avizosqo aj kadala xramosarde komentàrie sinesas dine le delegacienqe savorre themenqe aj le Themenqe - Rigenqe save na-i mēmbrură telal i fòrma jekhe adendumosqi k-o dokumèto CM(2001)91 palemdikhlo anθar o 27-to dīves le novembrosqo, k-o berś 2001;

¹ I Bòsnia-Hercegovina thaj i Federàlo Repùblika e Jugoslaviaqi.

² Palal i règula 39 la Rezoluciaqi (97) 10, «O Komitèto le Ministrurenqo akharel jekhe reprezentantos kaθar svako Rig kaj na-i mēmbro te bešel k-e pesqe kidimata svakovar kana si la atribùcie anθar i Konvència - kàdro, bi te avel la o xakaj te liel kotor k-o liipen le decizienqo.»

³ Anθ-o kontèksto e adoptisaripnasqo la Rezoluciaqo (97) 10, k-o 17 septèmbro e berśesqo 1997, O Komitèto le Ministrurenqo adoptisardās vi i kadaja règula: « E line decizie anθ-i bāza le artikulurenqi 24.1 thaj 25.2 anθar i Konvència - kàdro avena dikhle sar adoptisarde decizie kana duj trinimata anθar e reprezentantură le Xramosarutne Rigenqe save votisaren, save te den jekh butipen le reprezentanturenqo anθar e Xramosarute Riga aj save sine autorizisarde te rezidisaren anθ-o Komitèto le Ministrurenqo, sine vaś kadala decizie».

Rodindoj o avizo le konsultativone Komitetosqo thaj le xramosarde komentàrie le rumunikane governosqe;

Prinzarindoj, sa kadja, vi e komentàrie avere governurenqe;

1. Adoptisarel kadala konklùzie save dikhen i aplikàcia kaθar i Rumùnia e Konvenciaqi-kadrosqi:
 - I Rumùnia kerdàs ašarutne zora karing e themutne minoritèturà thaj karing penqe kultùre. Anθ-e palutne berša sinesas dikhle lačharimata save dikhen e maškarkomunitàro relàcie thaj o anglespidipen jekhe maj bare toleranciaqo klimatosqo karing e minoritèturà.

Sinesas adoptisarde jekh institucionàlo kàdro aj vastne / importànto krisutne garàncie vaś varesave artikulurà anθar i Konvència - kàdro thaj aver si te keren pen, tha' maj sine trebutne vi zora k-ašti te avel pherdo kadava kàdro aj k-ašti te dikhel pes kana vov si sastes / komplèt andino anθ-i pràktika .
 - Maj but zora sine trebutne, maj anglal, k-o nivèlo le medienqo, anθar i rig e publikosqe sektorosqi thaj e edukaciaqi, umala anθ-e save jekh baro dikhipen trebal te avel dino le themutne minoritèturenqe maj cìra ginale.
 - Savorre kamipnaça le autoritèturenqo - k-ašti te avel sigàrdi i integràcia le rromenqi - e ćacutne problème, kaj dikhen, po but, e diskriminaciaqe àkturà - save sinesas kerdine anθ-e ginale sektorurà e societetaqe - thaj e importànto sociàlo-ekonomikane bibarrabarrimata maškar e rroma thaj o aver kotor e zenutnipnasqo, kadja sar vi lenqo tretisaripen kaθar nesave reprezentànturà la ordinaqee.
2. Rekomendisarel ke i Rumùnia te avel la anθ-i godĩ e konklùzie sikavde anθ-o 1-to oprutni kotor, kadja sar vi verver komentàrie save sine anθ-o avizo e konsultativone Komitetosqo.
3. Akharel o rumunikano govèrno, palal i Rezolùcia (97) 10:
 - a. te thavdel maj dur o dialògo e konsultativone Komitetosqo;
 - b. te anel godãθe, sa vrjàma, e konsultativone Komitetosqe palal e mesùre save liela len k-ašti te aven thovdine anθ-i pràktika e konklùzie thaj e rekomendàcie save sine dine anθ-e maj opre prezentisarde ulavimata 1 thaj 2.